

**NEAUTORIZIRANI TRANSKRIPT**  
**10. HITNE SJEDNICE DOMA NARODA**  
**PARLAMENTARNE SKUPŠTINE BOSNE I HERCEGOVINE**  
**održane 04.03.2025. godine, sa početkom u 11:05 sati**

PREDSJEDAVAJUĆI  
NIKOLA ŠPIRIĆ

Dame i gospodo delegati, uvaženi gosti srdačno vas pozdravljam i otvaram 10. hitnu sjednicu Doma naroda Parlamentarne skupštine BiH.

/INTONIRANJE HIMNE/

Na sjednicu su pozvani naši redovni gosti predsjedavajući i članovi Savjeta ministara i Predsjedništva BiH. Sjednici prisustvuje 14 delegata od kojih 5 iz reda bošnjačkog naroda, 4 iz reda hrvatskog naroda i 5 iz reda srpskog naroda. Drugi zamjenik predsjedavajućeg doktor Dragan Čović iz opravdanih razloga nije u mogućnosti da prisustvuje današnjoj sjednici.

Deseta hitna sjednica ima sledeći

**D n e v n i r e d**

1. Zahtjev Predstavničkog doma Parlamentarne skupštine BiH za razmatranje Prijedloga zakona o dopuni Zakona o platama i naknadama u institucijama Bosne i Hercegovine po hitnom postupku, u skladu sa članom 124. Poslovnika Doma naroda, broj: 01-02-1-2385/24 od 19.12.2024. godine;
2. Zahtjev delegata u Domu naroda Džemala Smajića za razmatranje Prijedloga zakona o izmjenama Zakona o platama i naknadama u institucijama Bosne i Hercegovine po hitnom postupku, u skladu sa članom 124. Poslovnika Doma naroda, broj: 02-02-1-347/25 od 04.02.2025. godine

Na Kolegiju, koji smo održali prošle sedmice, dogovor je da se ovo dve tačke dnevnog reda po zahtjevu grupe delegata i na zahtjev kolege Smajića.

Prelazimo na prvu tačku dnevnog reda.

Povreda Poslovnika Nenad Vuković. Izvolite.

NENAD VUKOVIĆ

Predsjedavajući, članovi Kolegija, kolege delegati, članovi Savjeta ministara, ministri, zamjenici, zainteresovana javnošću BiH koristim priliku da vas sve pozdravim i poželim uspješan rad na današnjoj sjednici Doma naroda.

Nažalost, na početku ćemo morati ponovo početi, kao i na prethodnih nekoliko sjednica Doma naroda, sa kršenjem Poslovnika gdje, nažalost, rukovodstvo Doma naroda nastavlja sa upornim ignorisanjem pojedinih odredbi Poslovnika Doma naroda BiH. Pročitaću član 76. koji je veoma važan u ovom aktuelnom trenutku s obzirom da ste zakazali današnju hitnu sjednicu 10., a da nismo završili 9. sjednicu hitnu Doma naroda. Pretpostavljam da nećete moći ni da obrazložite kako je moguće da nismo 9. sjednicu završili, a da ste zakazali 10. sjednicu. Koristim se blagim riječima da ne kažem da je to neuobičajeno, da to možda evo možemo reći nije moguće da ne završimo 9. a da zakažemo 10. i da to pitanje potpuno ignorisemo kad je u pitanju ovaj visoki dom. Ali s obzirom da sam se javio za povredu Poslovnika pročitaću član 76. stav (4) – U slučaju da nema kvoruma, te ako nakon pauze predsjedavajući Doma utvrdi ili glasanje pokaže da i dalje nema kvoruma razmatranje pitanja odgađa se za sledeću sjednicu.

Mi smo upravo na 9. sjednici hitnoj Doma naroda imali ovaj slučaj nacrtan, nacrtan bukvalno iz ovog stava ovog člana. Utvrdili ste da nemamo kvoruma, imali smo pauzu, posle pauze delegati HDZ-a ili Kluba hrvatskog naroda, bolje rečeno, nisu bili u dovoljnom broju da bismo imali nastavak sjednice i mi smo danas na narednoj sjednici, kako to ovdje piše, odgađa se za sljedeću sjednicu, morali imati pitanja, odnosno tačku dnevnog reda koju smo imali na prethodnoj sjednici. Vi ste to potpuno izignorirali, zakazali ste ovu sjednicu sa tačkama dnevnog reda, koje uvažavam da trebamo i da o njima razgovaramo i kad su u pitanju plate funkcionera, plate drugih službenika, vojnika, policijskih službenika itd. uopšte ne govorim o tome da ne trebamo i to pitanje imati na dnevnom redu, ali ova upornost ili zloupotreba člana u kom se kaže da Poslovnik tumači Kolegij je nevjerovatna. Ne znam dokle ste spremni ići sa ovim, na svakoj sjednici to govorim, možda, možda ima nekih koji bi se drznuli reći opet ovaj isto priča, ja se neću umoriti, neću umoriti i ne znam da li je neispravno insistirati da poštuju ovaj Poslovnik Doma naroda, jedini akt po kom funkcioniše ovaj visoki dom. Ja razumijem da ima tema, odnosno članova Poslovnika koji možda zaslužuju neka tumačenja, gdje možda bismo mogli da kažemo da nije Poslovnik bio baš decidan, pa da dozvolimo da to može Kolegij da tumači, rekao bih da je to u redu, ali ovakav član, ja ne znam šta ovdje ima da se tumači. Još jednom čitam – U slučaju da nema kvoruma, te ako nakon pauze predsjedavajući Doma utvrdi ili glasanje pokaže da i dalje nema kvoruma razmatranje pitanja odgađa se za sljedeću sjednicu. Je li ovdje ima nešto za tumačenje ili ja ne znam ni ja kako, ne, ja zaista ne znam uopšte da li je moguće o čemu mi ovdje danas razgovaramo. Da li treba da vas podsjećam da smo imali tačku dnevnog reda prije nekih evo skoro godinu dana koja je bila vezana za blokade koje je proizvodio Klub Bošnjaka vezano za prijedlog gospodina Želimira Neškovića.

NIKOLA ŠPIRIĆ

Kolega Vukoviću, samo vrijeme, molim Vas poslovnički.

NENAD VUKOVIĆ

Evo pokušaću da skratim.

Tada smo imali situaciju da se nije mogla zakazati naredna sjednica dok se ne razriješe pitanja sa dnevnog reda, odnosno sa sjednice koja je bila inicirana prijedlogom Želimira Neškovića. Tad šest, sedam mjeseci nismo radili da bismo završili tu tačku dnevnog reda, da bi otkočili rad Doma naroda. Sad imamo, pa da kažemo, situaciju da smo prekinuli prošlu sjednicu, nedostatak kvoruma i imamo evo ignorisanje, da kažemo nema veze što nije bilo kvoruma, mi smo odlučili da na toj nema kvoruma, na ovoj ima

kvoruma, to je otprilike poruka raspravljaćemo o onome o čemu mi hoćemo da raspravljamo, a o čemu vi tražite da raspravljamo mi nećemo to dati uopšte da raspravljamo.

Nisam siguran da je ova situacija održiva, nisam siguran da ste u pravu ako mislite da odredba koja kaže da Kolegij tumači Poslovnik, on ne kaže da ga tumači kako hoće, niti može da izvrće članove, ni stavove pojedinih članova ovog Poslovnika i ja zbog toga tražim dopunu dnevnog reda na osnovu upravo ovog člana 76. jer vi ga niste uvažili zakazujući ovu sjednicu i predaću vam pismeno zahtjev za dopunu dnevnog reda 10. hitne sjednice, gdje se kaže: U skladu s odredom člana 76. stav (4), ovaj o kome sam pričao, a i članom 58. Poslovnika Doma naroda Parlamentarne skupštine, kojim je propisano da dnevni red može biti predložen i na početku njenog održavanja, a materijali podijeljeni na samoj sjednici, mi vam se obraćamo sa zahtjevom za dopunu dnevnog reda 10. hitne sjednice sa tačkom dnevnog reda, onom koju nismo završili prošli puta – Prijedlog odluke o razrješenju predsjedavajućeg, prvog zamjenika, drugog zamjenika predsjedavajućeg Nikole Špirića.

Ja vas molim da date ovaj naš zahtjev za dopunu dnevnog reda na izjašnjavanje, jer je to direktno podržano članom 76. stav (4) Poslovnika Doma naroda. Ja od vas tražim da prekinete praksu koju ste uspostavili

NIKOLA ŠPIRIĆ

Vrijeme, ponovo upozoravam na vrijeme kolega Vukoviću.

NENAD VUKOVIĆ

Ja vas samo još jednom upozoravam, nemojte provoditi praksu koja je uspostavljena koja nema utemeljenje u Poslovniku da na hitnim sjednicama navodno se ne može promijeniti dnevni red. Prošli put sam i pretprošli dok je predsjedavao gospodin Čović više puta pitao i naravno da nisam dobio odgovor, jer ga ne možete mi dati, gdje piše u ovom

NIKOLA ŠPIRIĆ

Molim Vas.

NENAD VUKOVIĆ

Poslovniku

NIKOLA ŠPIRIĆ

/nije uključen mikrofoni/

NENAD VUKOVIĆ

gdje piše u ovom Poslovniku da se na hitnim sjednicama ne može dopuniti dnevni red?

Ja vas molim da date na glasanje ovu dopunu dnevnog reda i molim službu da priđe da uzme prijedlog za dopunu dnevnog reda od mene ovdje.

NIKOLA ŠPIRIĆ

Dalje se javio kolega Želimir Nešković. Izvolite.

ŽELIMIR NEŠKOVIĆ

Zahvaljujem predsjedavajući.

Uvaženi Kolegijume, cijenjeni delegati, kolege, ministri u Savjetu ministara, uvaženi gosti, javnosti, ja prije svega želim da vas pozdravim, ali moram da izrazim žaljenje po ko zna koji put kada počinjemo sjednice, ovaj put ja moram reći da za mene i za, ja vjerujem, dobar dio javnosti u BiH prošla sjednica hitna nije završena, ali ja ću se pozvati na Poslovnik, znači sve protokolarno.

Dakle, član 76. stav (4), pardon ja se izvinjavam, jasno kaže – U slučaju da nema kvoruma, te ako nakon pauze predsjedavajući Doma utvrdi ili glasanje pokaže da i dalje nema kvoruma razmatranje pitanja odgađa se za sljedeću sjednicu.

Dakle, 18. februara ove godine imali smo hitnu sjednicu Doma naroda na kojoj smo raspravljali, željeli smo raspravljati o smjeni predsjedavajućeg, odnosno prvog zamjenika predsjedavajućeg Kolegijuma Doma naroda. Znači, u više navrata se pokušalo doći do kvoruma, na kraju nakon jednočasovne pauze konstatovali ste da nije bilo kvoruma za nastavak rada, odnosno za nastavak sjednice i uopšte, iako je materijal dostavljen, znači, svim delegatima, uredno uvršten praktično u tehničku službu Parlamentarne skupštine BiH, jasno možete naći, dakle, na sajtu Parlamentarne skupštine BiH materijal u kome se decidno objašnjava zahtjev i tačka dnevnog reda o navedenoj smjeni, odnosno o navedenoj tački. Nikada nismo diskutovali o tome, nije se glasalo o tome. Nađite mi bilo gdje u svijetu u nekom Parlamentu, molim vas, da se može preći na narednu hitnu sjednicu, a da prethodna hitna sjednica nije završena, ona je morala imati svoje diskusije ili ako nema zainteresovanih za diskusiju moralo se glasati po toj tački dnevnog reda. Molim vas, znači ovdje je Poslovnik decidan, ovdje nema nekih pitanja, tumačenja, zaista ne vidim razlog zašto bi se Poslovnik tumačio na ovakav ili onakav način. Ja sam danas očekivao nastavak prošle 9. hitne, a ne 10. hitnu sjednicu. Ako sve već započeli sjednicu na ovaj način zašto nam niste dali na dnevni red zapisnik sa prošle hitne sjednice da se izjasnimo o njemu? Dakle, ovdje ima cijeli niz manjkavosti, na ovaj način ne možete prelaziti preko tema, odnosno preko odluka koje su izuzetno važne za dalje funkcionisanje ne samo ovog visokog doma nego Parlamentarne skupštine BiH i generalno institucija u BiH.

NIKOLA ŠPIRIĆ

Kolega Neškoviću vrijeme ste probili za minutu.

ŽELIMIR NEŠKOVIĆ

Da li se to vama sviđalo ili ne, ali na ovaj način zaista grubo kršite Poslovnik i ne znam koliko ćete dugo imati priliku da to radite na ovaj način. Ja vas zaista molim i pozivam vas da ispoštujete Poslovnik o radu ovog visokog doma i da mi danas razgovaramo, dakle, na temu onog materijala koji je dostavljen na prošloj hitnoj sjednici, molim vas.

Hvala.

NIKOLA ŠPIRIĆ

Zahvaljujem.

Riječ je tražio kolega Zlatko Miletić i molim kolege da se posvetimo dnevnom redu.

## ZLATKO MILETIĆ

Hvala lijepo predsjedavajući.

Evo, s obzirom na činjenicu, pošto nas upozoravate da ne bi kršio Poslovnik, a imao bi vam svašta za reći, prvo mi dozvolite da sve prisutne u sali srdačno pozdravim i da vam kažem nekoliko, ako uspijem, novih stvari o kojim nije bilo riječi s tim evo da ponovim neke o kojima je bilo.

Znači, ovdje je neosporna činjenica, ovo što su kolege govorili, da ste prekršili Poslovnik, znači član 76. stav (4), a koji je pročitao gospodin Nenad. O čemu se zapravo ovdje radi? Napominjem i ovu činjenicu o kojim je gospodin Želimir govorio da u biti u prilog za ovu sjednicu, znači niste dostavili zapisnik vjerovatno iz načina ili zbog razloga da u stvari prikrijete bilo kakav dokument da bi mogli raspravljati o bilo čemu šta se desilo prošli put. Ali ja zaista ovu priliku koristim da vas upozorim na dvije stvari koje su vrlo ozbiljne. Imajući u vidu član 23. stav (1) tačku f) ja vam se više ne obraćam lično već kao prema instituciji, vi ste dužni da se brinete o ostvarivanju naših prava i obaveza iz člana 11. od stava (1) do (3) da bi mi mogli ispuniti svoju zakonsku i ustavnu funkciju, vi ste to dužni, znači nije to pitanje vaše privatne volje. I možda građanima ovo na trenutak će izgledati smiješno, meni je ovo vrlo ozbiljna stvar, ona jeste i odvija se na nekom, tako da ga nazovem, mikro planu, ali ovom opštem kršenju Ustava BiH na svim nivoima, u opštem kršenju zakona i ako hoćete, kako ja to vidim, u opštem kršenju sitima, na ovoj ovdje, gospodine Špiriću, pogledajte ovdje, u protekla dva do tri mjeseca vi kao članovi Kolegija, ne govorim o vama pojedinačno već kolektivno, u najmanje deset navrata ste kršili ovaj Poslovnik što je naš zakon o tome kako i na koji način trebamo raditi u ovom Domu i zaista ovo je izgubilo svaki smisao da se ponašate na ovakav način, jel ovo ako nastavite raditi, ja ću, neću imat drugog načina, ja ću vas zaista prijaviti nadležnom tužiteljstvu za provođenje, a postoji takvo kazneno djelo, samovlašća, jel ovako bahato ponašanje, da se ovako ponašate prema nama ovo zaista više je izgubilo svaki smisao.

Hvala lijepo.

## NIKOLA ŠPIRIĆ

../nije uključen mikrofon/...Šefik Džaferović, izvolite.

## ŠEFIK DŽAFEROVIĆ

Gospodine predsjedavajući, kolegice i kolege.

Ja sam već govorio o ovoj temi na nekoj od ranijih sjednica kada se prvi put ušlo u ovu tzv. neposlovničku ili sivu zonu od strane Kolegija. Ne znam kako ćete vi danas postupiti, to je vaša odgovornost, ali ja hoću da javno ponovim da to što se počelo raditi prije nekoliko sjednica ne uvažavanjem prijedloga zastupnika da se stavlja na glasanje njegov prijedlog ili njihovi prijedlozi za promjenu ili utvrđivanje dnevnog reda nas ne vodi nigdje. Želim da to javno kažem, povrijedili ste mnoge odredbe Poslovnika o radu Doma naroda, povrijedili ste odredbu kada vi sami utvrđujete dnevni red i hitne sjednice onemogućavate ljudima ili delegatima da predlažu izmjene, pa da ih stavite na glasanje, sve se to nekada ranije radilo, to je Poslovnik. Kršite odredbe koje govore o nastavku sjednice, treba se nastaviti prekinuta sjednica, to je normalna stvar, a ona posebno, dakle, odredba koja se tiče člana 76. stav (4) o kojoj se govorilo ovdje. Kažem, ne znam šta ćete uraditi, ali neću da šutim i hoću da javno kažem da je ovo flagrantno kršenje Poslovnika koje u konačnici može proizvesti vrlo ozbiljnu odgovornost.

Hvala vam na pažnji.

NIKOLA ŠPIRIĆ

Zahvaljujem.  
Kolega Nenad Vuković, izvolite.

NENAD VUKOVIĆ

S obzirom da u prvom javljanju predlažući dopunu dnevnog reda i govoreći o svemu onome o čemu sam govorio nisam imao vremena svakako da kažem sve što imam vezano za ovaj problem, ovaj, kad se tiče tačke dnevnog reda i Vašeg razrješenja, ja sam ostao dužan da kažem ono što je veoma važno i za sve ljude koji su ovdje, ali i posebno javnost koja nas prati. Mi ne želimo da ostavimo utisak da mi ovdje imamo neku vrstu lične borbe ili da imamo nešto protiv lično Vas pa da se u tome ogleda naša upornost da stavimo na glasanje Vaše razrješenje. Ja moram podvući i reći tri stvari zbog kojih mi to tražimo i koje treba da budu opšte poznate svima.

Prva stvar je da su to politički razlozi i da mi smatramo da je Vaša smjena, odnosno vaše razrješenje iz Kolegija na neki način nastavak rješavanja ove političke situacije koju imamo na nivou institucija BiH i jedno totalno raspakivanje prethodne vlasti koja ne funkcioniše iz koje su javno izašli neki koalicioni partneri, a da bismo došli do nove mislim da je put i da se desi Vaše razrješenje. Prema tome, to su politički razlozi, a ne lični. S druge strane poseban razlog je sad ovaj novi, a to je Vaše rukovođenje na mjestu predsjedavajućeg puno kršenja Poslovnika, nepravilnih zakazivanja sjednica. Gdje su nam zakoni, gdje nam je Zakon o PDV-u? Gdje su sad one priče koje su bile da smo mi dobronamjerni prema mladim bračnim parovima? Prošao Zakon u Predstavničkom domu što ga niste stavili ovdje na dnevni red, što nemamo to? Znači, imamo razloge i da se trebete maknuti sa te pozicije da bi otkočili donošenje zakona koji su u interesu svih građana i Republike Srpske i Federacije, Vi to kao član Kolegija nećete raditi i mi to znamo kako ste radili u prethodnom vremenu, to je drugi razlog. A posebno je na kraju važno zbog javnosti Republike Srpske reći da Vaše sjedenje tu nema veze sa zaštitom interesa Republike Srpske i taj narativ mi moramo da kažemo na neki način mu odgovorimo koliko god da ste Vi glasni u tome da je tri veće od dva i da je to što Vi sjedite tu interes Republike Srpske i da će navodno imati neku štetu Republika Srpska ako Vi tu niste. Mi moramo da objasnimo ljudima da to nikakve veze nema s interesima Republike Srpske, ništa se loše desiti neće Republici Srpskoj da sjedi tu bilo ko drugi od, iz Kluba delegata srpskog naroda i da ta teza nema nikakvo utemeljenje u bilo čemu i da je to nevjerovatan odbrambeni mehanizma da se kaže mora taj i taj čovjek tu sjediti i mi ne smijemo da dozvolimo glasanje o njemu, jer ako on tu ne sjedi ugrožena će biti Republika Srpska. Pa ja ne znam ni kako izgovaram ovo što govorim, a kamo li da kažem da je potrebno, a jeste nažalost izgleda i neophodno, stalno objašnjavati ljudima da to nema, da kažemo, nikakvog utemeljenja u tome. U tom pogledu ja moram na kraju odbaciti

NIKOLA ŠPIRIĆ

Vrijeme, kolega Vukoviću.

NENAD VUKOVIĆ

ja moram odbaciti sve moguće, da kažem, priče u javnosti koje pokušavate plasirati Vi i pripadnici Vaše političke partije ili koalicije da mi ovdje radimo neke stvari protiv interesa Republike Srpske i vezivati tu stolicu na kojoj Vi sjedite ili Vaše učešće u Kolegiju sa interesima Republike Srpske ili s aktuelnom

političkom situacijom to zaista evo, ja ću zasad reći da je to neprimjereno i nepristojno da ne koristim neke druge termine.

Molim vas još jednom na kraju

NIKOLA ŠPIRIĆ

Vrijeme.

NENAD VUKOVIĆ

dajte na glasanje dopunu dnevnog reda po prijedlogu koji sam dao pismeno službi, vjerujem da je to već do vas došlo i takođe molim sekretara da se uključi u pravno-poslovničke stvari vezano za sve ovo o čemu govorimo i na ovaj sjednici i na prethodnim sjednicama gdje ne bi bilo i neuobičajeno i da Sekretarijat sa pravne strane kaže šta misli o ovom stvarima.

Hvala lijepo.

NIKOLA ŠPIRIĆ

/nije uključen mikrofon/

SAFET SOFTIĆ

Pa žao mi je što se javljam po istom pitanju ali mislim da je stvar već dobila takve dimenzije da svi mi koji sjedimo ovdje ne smijemo biti gluhi u odnosu na ovo što se događa. Naime, kada je gospodin Čović, Vaš prethodnik, počeo sa kršenjem Poslovnika i uveo tu praksu u ovaj Dom mi smo nekako blago reagirali i mislili smo da će to vjerovatno zbog tih evropskih zakona koji su bili na dnevnom redu dobiti neku drugu dimenziju. Međutim, kako koja sjednica odmiče mi vidimo da se Poslovnik u stvari više ne poštuje ni u jednom segmentu i zaista se postavlja pitanje koliko ima svrhe da sjedimo ovdje i da razgovaramo koliko taj temeljni akt koji nas obavezuje u ovom Domu, kako da se ponašamo, ne poštujemo. Ja moram kazati da sve vrijeme razmišljam ustvari čemu sve ovo skupa služi jer ako se ne varam mi smo zadnju redovnu sjednicu ovog Doma održali u oktobru mjesecu. U oktobru mjesecu, dakle prije pet mjeseci ovaj Dom je imao redovnu sjednicu i redovno zasjedanje. Otad smo održali jednu ili dvije čini mi se hitne sjednice od kojih smo jednu prekinuli i tu sjednicu nismo zakazali nego smo zakazali novu sjednicu. Mislim da ovo zaista prelazi sve granice i zaista ne znam dokle mislite da idete sa ovim jer ovo, ovo gubi svaki smisao. Dakle, ovoliki nerad prije svega u zakazivanju sjednica, održavanju sjednica, a evo sada i kršenje Poslovnika u vezi sa smjenom jednog člana Kolegija prelazi zaista granicu dobrog ukusa. Naime, ja ne pamtim situaciju u kojoj neko svoju poziciju štiti na način da ne zakazuje sjednicu na kojoj se o tome raspravlja, jednostavno ne mogu da prihvatim činjenicu da postoji takva situacija. Znači u ovom Domu ovdje od 15 ljudi, 9 ljudi sasvim sigurno je javno kazalo da ne podržava člana Kolegija, gospodina Nikolu Špirića, 9 ljudi od 15. I mi već dva mjeseca muku mučimo kako da dođemo uopće u priliku da glasamo o tome. Danas smo znači ponovo evo zakazali sjednicu na kojoj treba da raspravljamo oko ovih zakona, ustvari ovo sve ostalo visi u zraku.

Ne znam zaista kud idete, ali sutra je 5. mart, sutra je rok do kojeg je Evropskoj uniji trebalo dostaviti dva zakona koji su uslov za ovaj plan rasta, Zakon o VSTV-u, Zakon o Sudu BiH. Trebalo je do sutra usvojiti državni budžet, trebalo je do sutra odrediti pregovarača BiH za

pregovore, niko o tome ne govori. Zaista mislim predsjedavajući da ovo što radite, ukoliko imate stida, ukoliko imate savjesti, ja mislim da trebate pod hitno prihvatiti ovaj prijedlog da se dopuni današnji dnevni red sa ovom tačkom koja je po članu 76. ostala od prošlog puta i da nastavimo dalje raditi. Sve ostalo mislim da vodi u anarhiju, a to nam u ovom trenutku čini mi se najmanje treba.

Hvala lijepo.

NIKOLA ŠPIRIĆ

Zahvaljujem kolegi Softiću.

Kolega Zlatko Miletić, ponovo ispravka krivog navoda.

ZLATKO MILETIĆ

Dvije ispravke krivog navoda, nadam se da se gospodin Softić neće ljutiti, samo da malo popravim. Vi ste inače kao članovi Kolegija, a Vi ponaosob po članu 53. stav (3) dužni najmanje jednom mjesečno da sazovete sjednicu Doma naroda redovnu. Kad su u pitanju zajedničke sjednice što Vi niste radili, znači bili ste ili trebali ste biti u stanju da po članu 18. stav (2) sazovete najmanje jednom godišnje jednu zajedničku sjednicu i žao mi je evo što, kad je već predsjedateljica tu da iskoristim priliku da je pozdravim, da ste nam uskratili priliku da je pitamo bilo šta. To je trebala biti treća, a ne prva sjednica.

I još jednu stvar, zapravo dvije koje sam zaboravio reći, da dopunim gospodina Vukovića, ja mislim da ovo Vaše ponašanje ima kontekst ili ako hoćete slijed rušenja ustavnog poretka BiH. I ako zaista mislite da ćete na taj način, kao što rušite druge institucije u BiH srušiti Dom naroda, grdno se varate.

I četvrta stvar, kad već govorimo o vašem, je li to iz nas izvlačite, vi iz nas izvlačite da iz nas izađe najveće zlo da bi vi shvatili o čemu se radi. Znači po pitanju Vašeg integriteta, onog dana kad ste stavljeni na ovu američku listu, Vi zaista niste trebali više nikad ništa da obavljate, da ne ulazim u razloge zašto je to urađeno. Znači, nemojte tražiti od nas da se spuštamo na taj nivo i da diskutujemo na taj način. Ja Vas molim da prihvatite sugestiju kolege Vukovića, stavite ovo na dnevni red to pitanje da završimo jer je to demokratski proces i morate shvatiti da mi na to imamo pravo. Ako imamo većinu, zašto Vi tu morate sjediti? Ja nemam nikakav problem da sjedi bilo ko drugi.

Hvala lijepo.

NIKOLA ŠPIRIĆ

Zahvaljujem.

Izašli smo iz rasprave o povredi Poslovnika krivim navodima. Dakle samo jednu rečenicu kolega Kovačeviću prije nego dobijete riječ. Ne radi se o rušenju ustavnog poretka. Dakle, može svak ko govori, govori o sebi, onaj ko govori o mom dignitetu, govori o svom lično. Ja se neću lično obraćati i zato vas molim da se vratimo dnevnom redu.

Kolega Radovan Kovačević, izvolite.

RADOVAN KOVAČEVIĆ

Hvala gospodine predsjedavajući. Članovi Kolegijuma, kolegice, kolege, poštovana predsjedavajuća Savjeta ministara, ministri.

Pa samo kratko, ovo što je rekao gospodin Miletić, da neko ko je završio na bilo kakvoj crnoj listi ili dobio bilo kakve sankcije SAD-a ne bi trebao ništa da obavlja. Mi smo ovdje, ja koliko znam, institucija BiH, predstavnici Republike Srpske i Federacije BiH, predstavnici tri konstitutivna naroda u BiH, nismo predstavnici SAD-a. Gospodin Špirić je dobio sankcije zato što je insistirao na tome da se poštuje Dejtonski sporazum, da se poštuje Ustav BiH i da se poštuju interesi Republike Srpske i interesi srpskog konstitutivnog naroda u BiH, pa su oni rekli da to u nekom trenutku ugrožava interese SAD-a, odnosno te administracije koju je u tom trenutku predvodio ne mogu sad da se sjetim koji predsjednik. To je to, on nije uradio ništa protiv BiH i to sada treba da bude argument da bilo ko u BiH, od Marinka Čavare, Nikole Špirića, Milorada Dodika, ili bilo koga drugog, treba da bude eliminisan sa političke scene zbog toga što je neka druga strana vlada procijenila da ne radi u njihovim interesima, nego radi u interesima svoje zemlje i svog naroda. Ja mislim da je to jako neozbiljno. I sada vidimo priču koja nam je, koja nam se otvara ovih dana, vidimo na koji način se predsjednik Tramp ponaša prema USAID-u, vidimo da je njegov najbliži saradnik Elon Mask rekao da se radi o kriminalnoj organizaciji, a vidimo isto tako da je ta organizacija u BiH samo u posljednje tri godine zvanično upumpala 402 miliona američkih dolara, to je skoro milijarda KM. Pa onda dalje vidimo, o tome nam je govorio ministar finansija, da za 250 miliona dolara ne postoji nikakav podatak gdje su ušli, koja je bila njihova namjena, zašto su potrošeni, na koji način su eto doprinijeli promociji američkih interesa ili poboljšanju bilo čega i bilo kojeg aspekta života u Republici Srpskoj, Federaciji ili BiH. Pa onda vidimo da nam sada dolaze već ljudi, evo nedavno je u Republici Srpskoj boravio bivši federalni tužilac iz SAD-a

NIKOLA ŠPIRIĆ

Vrijeme kolega Kovačeviću.

RADOVAN KOVAČEVIĆ

Hvala, veoma ću kratko.

Gospodin De Luca koji jasno kaže da su radili sljedeću stvar, da su ovdje upumpavali novac i obilježavali Republiku Srpsku kao nekakvog neprijatelja kako bi imali argument da ovdje upumpavaju novac, a da su onda taj novac izvlačili i koristili ga kako bi onemogućili povratak Donalda Trampa na vlast. To su stvari koje su se i sada to treba biti argument da neko ovdje ne može da vrši neku funkciju zbog nekih sankcija koje su uvedene bez bilo kakvog argumenta, bez bilo kakvog dokaza, bez bilo čega, osim tvrdnje da neko je radio nešto što nije u interesu u tom trenutku da određenom vladom, politikom određene strane zemlje. Ja mislim da je to neozbiljno i da na taj način još jednom pokazujemo da nas sve zanima, osim da nas zanima suverenitet BiH.

Hvala vam.

NIKOLA ŠPIRIĆ

Zahvaljujem.

Idemo ponovo u krug krivih navoda. Zlatko Miletić, izvolite.

ZLATKO MILETIĆ

Gospodine Kovačeviću, na čudan način izražavate kako vas interesuje suverenitet BiH, ali evo ja ne volim da pričam o ljudima kojih ovdje nema, ali hoću da vas podsjetim na jednu stvar, kad već pričate o USAID-u, tom famoznom novcu, ako ste već tako principijelni zašto takav stav nemate prema bivšoj premijerki Republike Srbije i sadašnjoj predsjednici Skupštine koja je kao šef Izvršnog programa USAID-a došla na to mjesto, prema gospođi Brnabić, ako već Vi tako principijelno zastupate taj stav? Ovim ljudima koje ste pomenuli iz Republike Srpske, s obzirom da ih nema, ja ih neću govoriti. Nećete mi uvući u tu priču da govorim o pojedinostima zašto je gospodin Špirić na toj listi, a imao bih štošta da kažem, ali hoću da Vam kažem jednu stvar. Gospodin Špirić i njih nekolicina koji sjede ovdje u Domu naroda su posljedica nerada naših pravosudnih institucija. Kod nas da postoji sistem pravde oni bi odavno bili na mjestu gdje zaslužuju da budu, a ne ovdje da sjede u Domu naroda, nažalost. Ali mi ćemo sve napraviti da te institucije profunkcionišu u narednom periodu bez obzira o kome se radi.

NIKOLA ŠPIRIĆ

Zahvaljujem. Jedno upozorenje, bez odnosa prema nekima koji nisu ni državljani BiH u raspravi i moja molba da se vratimo dnevnom redu. Dakle neću nikome uskratiti pravo da govori jer je takav Poslovnik, ali moja obaveza je da upozorim.

Kolega Želimir Nešković.

ŽELIMIR NEŠKOVIĆ

Zahvaljujem predsjedavajući.

Da ne bi bilo zabune zašto smo mi iz Srpske demokratske stranke pokrenuli inicijativu, odnosno zahtjev za smjenu gospodina Špirića, on je potpuno jasan. Dakle, nadovezaću se djelimično i na gospodina Miletića, nerad, mogu da dokažu predstavnici svih opozicionih stranaka i u Domu naroda i u Predstavničkom domu Parlamenta BiH. Znači možemo pričati i o Savjetu ministara, ali to nije konkretno Vaše pitanje. Znači činjenica je da zadnjih četiri mjeseca ovaj visoki Dom radi u nekom lošem kapacitetu, da mi nemamo ovdje pred sobom rješenja, zakone, odluke koje treba da pomognu svakom građaninu i u Republici Srpskoj i u Federaciji BiH, i u Brčko Distriktu, ali to nije samo Vaš teret, tako da niste Vi jedini koji ste krivi za to u ovom sistemu vladavine ovakve vladajuće strukture na nivou BiH, ali jeste odgovorni kao član SNSD-a, kao visoki funkcioner SNSD-a za sve ono, zajedno sa vašim kolegama iz SNSD-a, za sve ono što je loše u Republici Srpskoj, a to je čitav niz pitanja, od lošeg standarda građana, uništene Elektroprivrede Republike Srpske. Evo jučer sam vidio da je dug ...

NIKOLA ŠPIRIĆ

Mogu li vas zamoliti da se vratite na dnevni red?

ŽELIMIR NEŠKOVIĆ

Dajte mi samo 20 sekundi. Dug rudnika i termoelektrane znači u prošloj godini minus je 39 miliona KM, neću ići u detalje. Da ne pričamo o Šumama Srpske, pitanje koje je poteglo krajem prošle godine i početkom ove godine. To je dokaz da nijedan funkcioner SNSD-a, odnosno nijedan visoki, visokopozicionirani član SNSD-a ne treba da bude funkcioner ne samo na nivou BiH, nego i u Republici Srpskoj, ali polako doći ćemo i na ta pitanja. I to je ta poruka koju vam šaljem, a o ovim nekim drugim pitanjima nek rasprave. Raspravite slobodno ko je stimulisan od strane USAID-a, zna se da je najveći broj lokalnih zajednica i Vlada Republike Srpske

NIKOLA ŠPIRIĆ

Vrijeme gospodine Neškoviću.

ŽELIMIR NEŠKOVIĆ

dobijala najveća sredstva od USAID-a.

NIKOLA ŠPIRIĆ

Za riječ se javio ponovo kolega Zlatko Miletić, ispravka krivog navoda.

ZLATKO MILETIĆ

Vas gospodine predsjedavajući da ispravim u jednom kontekstu, ja se zaista gospođi izvinjavam i ne bih je pomenuo da gospodin Kovačević nije govorio o toj organizaciji, a jedan dio ljudi pa iz te političke partije sasvim izvjesno bio u direktnoj konekciji sa .., ali neću o tome da kažem. Ako već pominjete taj kontekst, hoću da kažem zašto mi njih ne bi pominjali u tom smislu kad recimo gospodin Vučić kao predsjednik Republike Srbije, nama susjedne prijateljske države, proglasi vitalni nacionalnim interesom Srbije suđenje čovjeku u BiH.

NIKOLA ŠPIRIĆ

Molim, Vas ponovo Zlatko, ponovo Vas upozoravam

ZLATKO MILETIĆ

To je direktno kršenje Dejtonskog mirovnog sporazuma, direktno. Ali to što ovi naši klimoglavci iz Federacije neću to neće da vam kažu, to je problem druge vrste.

NIKOLA ŠPIRIĆ

/nije uključen mikrofon/

NENAD VUKOVIĆ

Hvala lijepa. Prije nego što nastavim dalje diskutovati, koristim priliku da pozdravim predsjedavajuću Savjeta ministara koja nije bila u momentu kad sam se prvi put obraćao, pa se nadam da nema zamjerke u vezi s tim.

Prije nego što iskoristim i treći put povredu Poslovnika, ja insistiram da mi date odgovor da li ćete staviti na glasanje prijedlog koji sam u pismenoj formi dao službi vezano za dopunu dnevnog reda, a u skladu sa članom 76. da se mora završiti tačka dnevnog reda sa prošle sjednice koja je prekinuta nedostatkom kvoruma. Da li ćete staviti to na izjašnjavanje na Dom?

NIKOLA ŠPIRIĆ

Dnevni red ste dobili u prilogu.

NENAD VUKOVIĆ

Nećete da stavite to na dnevni red?

Nisam završio, još jednom Vas pitam – znači Vi odbijate da dopustite da se Dom izjasni o prijedlogu koji smo mi delegati

NIKOLA ŠPIRIĆ

Molim Vas da ne repliciramo, završite povredu Poslovnika. Jeste li završili?

NENAD VUKOVIĆ

Nisam završio.

NIKOLA ŠPIRIĆ

Pa izvolite.

NENAD VUKOVIĆ

Dobro.

Ja ću predložiti, s obzirom da vidim da Vi ne želite da dopustite da se Dom izjasni o Prijedlogu dopune dnevnog reda u skladu sa članom 76, koji je opet kažem veoma jasan, koji ne dopušta nikakva tumačenja. Biću primoran da učinim sljedeći korak pokušavajući da se snađemo u ovom svemu što nam priređujete vezano za kršenje Poslovnika, predložiti ću zaključak, evo ne mogu samo da završe kolege pošto pričaju ...

Hvala. Biću primoran da predložim zaključak da prevaziđemo ovu situaciju u koju ste nas Vi uveli nepravdim tumačenjem Poslovnika, pa da probamo na ovaj način da radimo s obzirom da ste Vi ovako radili na prethodnim sjednicama i ovo je Vaša praksa što ću ja sada predložiti, a to je zaključak kojim tražim da se odmah nakon 10. sjednice danas organizuje 11. sjednica, kako ste radili prošli put i mnogo puta do sada i kako ste i tu praksu uspostavili. Moj prijedlog je sljedeći, da se usvoji zaključak, odnosno Dom da se o njemu izjasni:

– Zakazuje se 11. hitna sjednica Doma naroda Parlamentarne skupštine BiH sa dnevnim redom kako slijedi:

1. Prijedlog odluke o razrješenju predsjedavajućeg, prvog zamjenika predsjedavajućeg i drugog zamjenika predsjedavajućeg Doma naroda Parlamentarne skupštine BiH, Nikole Špirića.
2. Prijedlog odluke o smjeni ministra spoljnje trgovine i ekonomskih odnosa BiH, Staše Košarca, i ministra finansija i trezora BiH, Srđana Amidžića.

11. hitna sjednica Doma naroda PS BiH održat će se odmah po okončanju 10. sjednice, 10. hitne sjednice Doma naroda PS BiH. Molim službu da dođe da preuzme materijal koji je spreman, odnosno zaključak i u prilogu zaključka ukoliko bude usvojen i predložena odluka dok prethodnu odluku imate od ranije koji smo vam dostavili.

Izvolite. Hvala lijepo.

NIKOLA ŠPIRIĆ

Hvala lijepo.

Riječ je tražio, povreda Poslovnika, kolega Kemal Ademović. Izvolite.

KEMAL ADEMOVIĆ

Hvala predsjedavajući. Koleginice i kolege delegati, predsjedavajuća Vijeća ministara, ministri, zamjenici, svi prisutni u sali, dame i gospodo, sve vas srdačno pozdravljam.

Naravno, ovo se već pretvorilo u politička prepucavanja. Kao što je to uobičajno, dakle odstupili smo od vođenja aktivnosti koje su nama propisane i zadane, dakle i donošenju prije svega zakona i ostalih akata koji su u interesu BiH i onih koje se predlažu. Često se spomene prošle godine blokada koju je napravio Klub Bošnjaka od šest, sedam mjeseci, kojom prilikom nisu donošeni zakoni što je apsolutno netačno. Dakle, ja sam predsjedavao, u martu je bila ta 14. sjednica, blokada je bila te sjednice. Svi zakoni na evropskom putu koji su došli sa Predstavničkog doma su usvojeni na hitnim sjednicama i prva od takvih sjednica bila je odmah u martu, govorim o Zakonu o sprječavanju pranja novca na hitnoj sjednici na prijedlog Kluba Bošnjaka plus čini mi se Miletić delegat. Dakle, nije bilo te vrste zastoja i nije bilo tačaka koje su ugrozile funkcionisanje bilo kojeg organa. Dakle usvojen je i budžet, usvojeno je sve što je trebalo biti usvojeno. Tome je prethodila činjenica da sam ja kao predsjedavajući ipak dao na izjašnjavanje prijedlog izmjene dnevnog reda, izmjene i dopune dnevnog reda. Zato apelujem na Vas predsjedavajući da dozvolite nek se izjasni Dom o bilo kojem prijedlogu, kao što je to i dosad bilo, bilo koji prijedlog ovdje koji je dolazio usvajanje je i na redovnim i na hitnim sjednicama, dakle izjašnjavao se Dom o tom uvrštavanju u dnevni red. Nek se to uvrsti u dnevni red jer Poslovnik propisuje takvu mogućnost kod sazivanja hitnih sjednica, da se može na početku same sjednice da se mogu podijeliti materijali, da se može predlagati dopuna dnevnog reda i ne vidim zašto bi sada nekim kao tumačenjem Kolegija se govorilo o tome da nije moguće dopuniti dnevni red. Moguće ga je dopuniti i ja sam kao predsjedavajući dozvolio tako jednu dopunu kad se radilo o ovom jednom zakonu i boli me kad me se svrstava – iz Kolegija, vi kršite, vi ovo, vi ono itd. Ja bih volio da mi se pobroji šta sam ja prekršio pa da odgovorim na to i da odgovaram za to. nemam nikakav problem. Dakle, nisam ovdje da kršim bilo šta, ovdje sam u službi građana, ovdje sam u javnom interesu, nisam zbog sebe lično. Tako da Vas molim predsjedavajući dozvolite, omogućite nek se dopuni dnevni red sa bilo kojom tačkom za koju ima prijedlog ovlaštenog predlagача koji, jer se kaže da se može, ima jedna nedorečenost, ja sam pripremio Prijedlog zaključka dakle kad su u pitanju zakazivanje hitnih sjednica jer Poslovnik kaže u roku od tri dana sazvat će, i neprecizirano je da li u roku tri dana će se i održati, nego sazvati će, a onda kad će je sazvati, za 10, za 15, za mjesec, sa šest mjeseci, gdje su gubi, gubi se ta hitnost. Zašto bi neka sjednica bila hitna ako se zakaže za 10, 14, 15 dana, ako su to odredbe za redovnu sjednicu? Dakle, ja sam pripremio jedan

Prijedlog zaključka koji govori o tome da će se sjednica i zakazati i održati u roku od tri dana. Dođe zahtjev, to je ta hitnost. Može postojati neka hitnost, zakaže se, održi se sjednica i to je to.  
Hvala.

NIKOLA ŠPIRIĆ

Zahvaljujem.

Prije nego dam riječ kolegi Želimiru Neškoviću moram da kažem da je stav jedinstven, stav Kolegija bio da su ovo dvije tačke dnevnog reda. Vidim danas kolega Ademović ima drugi stav, kolege Čovića danas nema, dakle u Kolegiju nema konsenzusa. Imamo dnevni red koji ste dobili.

Kolega Želimir Nešković, povreda Poslovnika.

ŽELIMIR NEŠKOVIĆ

Ja ne mogu da se oduzmem utisku da ste prekršili Poslovnik nekoliko puta, dakle hajde što nećete da dozvolite da nastavak prošle hitne sjednice, nego ne vidim zašto imate strah da uvrstite u dnevni red znači zahtjev koji je uputio gospodin Vuković, odnosno tačku dnevnog reda. Znači u toku mog rada u ovom visokom Domu imao sam priliku da u toku održavanja hitnih sjednica prisustvujem dopuni dnevnog reda, to Vi dobro znate. Znam da znate zato što ste ih vi činili, činili ste ih i u prošlim mandatima i veliki dio, veliki broj prisutnih delegata ovdje zna za tu praksu. I znamo da žonglirate, igrate se sa Poslovnikom o radu ovog visokog Doma, koristite ga na način kako Vama odgovara, on je takav, rastegljiv i omogućava vam određivanje po raznim pitanjima kako vam politički šta odgovara. Ali ne znam odakle vam toliki strah? Desit će se jednom i da razgovaramo na tu temu, ne vidim zašto toliko to odlažete. Pustite da razgovaramo o tim pitanjima, evo sugerišu vam ljudi iz svih klubova, iz različitih političkih organizacija. Dakle, svjesni ste da postoji i opšta i entitetska većina, nemojte misliti da ćete kupovinom vremena promijeniti tu većinu. Ne znam zašto toliki strah i tolika zloupotreba u tumačenju Poslovnika. Izgubit ćemo smisao u radu ovog visokog Doma. Evo kolege Vam sugerišu da, mjesecima mi ne radimo na način da donosimo zakone, da radimo nešto produktivno. Za šta primamo platu ovdje? Ne možemo mi zbog vaše blokade zaustaviti sve procese u ovoj državi. Ne možemo zaustaviti donošenje zakona o PDV-u koji svaki dan mene, mogu mislit koliko vas zovu ljudi zbog kupovine stana prve nekretnine. Znači ogroman broj mladih bračnih parova, da ne pričamo o budžetu, o onim bitnim pitanjima za sve građane u ovoj zemlji. Znači ne vidim zašto toliki strah, dajte da razriješimo više ta pitanja, nemojte biti toliko sebični.

Hvala.

NIKOLA ŠPIRIĆ

Zahvaljujem. Sve će biti riješeno.

Kolega Kemal Ademović, prvi zamjenik predsjedavajućeg, ispravka krivog navoda.

KEMAL ADEMOVIĆ

Istina je da smo mi na Kolegiju dobili ove dvije tačke koje su dostaviti ovlašteni predlagači i zahtijevali sazivanje hitne sjednice. To je tačno, međutim Poslovnik kaže da se može dopuniti i na početku sjednice, da se može dopuniti dnevni red kako hitne, tako i redovne i one odredbe koje se odnose na dopunjavanje dnevnog reda i u redovnoj sjednici, tamo u redovnoj proceduri mogu se odnositi i na hitnu proceduru, dakle ne vidim razloga za, a ne zakazuje se ni redovna sjednica, dakle ne vidim razloga zašto se to ne bi. Ono šta sam se ja protivio bilo je ovi rokovi zakazivanja na Kolegiju, dakle 4. ti je bio daleko datum, ali da sam ja bio protiv ne bi bilo ni ove sjednice, dakle da sam ja bio protiv datuma 4., ne bi se ni ova sjednica desila jer ako je jedan član Kolegija, onda nema saglasnosti, nema sjednice nikako.

Hvala.

NIKOLA ŠPIRIĆ

Zahvaljujem.

Ispravka krivog navoda, kolega Zlatko Miletić.

ZLATKO MILETIĆ

Gospodine Ademoviću dozvolite mi da pretpostavim kad ste se obraćali ovo prvi put, ne zadnji, da ste uvjetno rečeno mislili na mene. Ja Vas i ja ću to opet ponoviti, Vi ste moj drug i to nikad neće prestati. Jedno je funkcionisanje Kolegija kao institucije, drugo je drugarstvo. Ujedno da odgovorim u kontekstu prošle sjednice kad je to pitanje pomenuo neko od kolega iz SNSD-a, šta želim da vam kažem, evo maloprije gospodin Špirić Vam reče da to tako niste mislili kad ste bili sami negdje tamo, znači ja neću da ulazim u te međusobne odnose vas trojice. Samo da jednu digresiju napravim, da razumijete o čemu se radi, prije nekoliko sjednica takođe je bila hitna sjednica, na silu ste ugurali da se primijeni, s pravom je žena to tražila, gospođa Pendeš, da se izvrši promjena Poslovnika jednog povjerenstva. Na silu ste tu promjenu ubacili na hitnu sjednicu i pozvali se na član 124. da se to uradi po hitnom postupku od četiri stava. Nigdje se bilo kojim slovom ne pominje ništa drugo sem zakona. I to ko biva može, a ovo ko biva ne može. Znači stvarno vrijeđate nam inteligenciju.

A gospodine Špiriću, s obzirom evo da Kemal Ademović ima jedan stav, Vi drugi stav, znači nemate konsenzus oko toga. Stavite ova pitanja na dnevni red nek se ljudi u demokratskom smislu izjasne o tim pitanjima, pa ćemo vidjeti na čemu smo.

Hvala ljepo.

NIKOLA ŠPIRIĆ

...Kovačević je tražio riječ, izvolite.

RADOVAN KOVAČEVIĆ

Hvala, gospodine predsjedavajući.

Zanimljivo mi je ovo što sam čuo ranije od gospodina Miletića kako, kako kaže, gospodin Špirić ne bi smio nigdje da bude jer su Sjedinjene Američke Države procijenile da on radi protiv

interesa Sjedinjenih Američkih Država, a istovremeno smatra da je grozno što je predsjednik Srbije, Aleksandar Vučić, imao bilo kakav stav o presudi, odnosno o procesu protiv, političkom procesu protiv predsjednika Republike Srpske, Milorada Dodika. Znači, stav jedne strane zemlje je obavezujući za nas i ne može niko da obavlja ni jednu funkciju ako je ta strana zemlja rekla da on nije baš fin momak, a ako je u pitanju Srbija, predsjednik Srbije ne smije da kaže ništa o Srbima u BiH. I uzgred, kada kažete da on smatra da je to presuda protiv naroda, ja bih da Vam kažem da to cijeli srpski narod misli, da je to bio proces protiv srpskog naroda,

\_\_\_\_\_ (?)  
/nije uključen mikrofoni/

RADOVAN KOVAČEVIĆ

da je to bio proces protiv Republike Srpske i tu su stvari potpuno jasne. Dakle, mi smo imali jedan proces politički koji se vodio na osnovu toga što jedan stranac, opet stranac, došao u BiH jedan dan i rekao – dobar dan, evo ja sam visoki predstavnik, bez da je na bilo koji način imenovan, na legitiman način kako je to predvidio aneks 10. Dejtonskog sporazuma i da je on onda počeo da mijenja zakone i da je on onda rekao ko ne poštuje moje odluke njemu će da se sudi, on će da ide u zatvor. I onda imate proces u kojem predsjedniku Republike neko sudi i u samoj optužnici piše da je poštovao Ustav Republike Srpske. Ako to nije proces protiv Republike Srpske i srpskog naroda kako onda bilo koji budući predsjednik Republike Srpske da položi zakletvu i da kaže da će poštovati Ustav Republike Srpske ako smo došli u situaciju da zbog nekog stranca koji nema nikakav legitimitet da radi bilo šta u BiH se presuđuje predsjednik Republike zbog toga što je poštovao Ustav. Tu su stvari potpuno jasne.

I još jedna stvar. Gospodin Nešković još jednom želi da pojasni zbog čega traže...

NIKOLA ŠPIRIĆ  
Vrijeme.

RADOVAN KOVAČEVIĆ

Evo, kratko ću.

Zbog čega traže smjenu predstavnika srpskog naroda u Kolegijumu, iako je gospodin Miletić rekao da bi to podržao između ostalog i zbog toga što je gospodin Špirić pod sankcijama Sjedinjenih Američkih Država i sve to zajedno sa ljudima iz SDS-a, sa strankom koja je pod sankcijama Sjedinjenih Američkih Država. Meni je to malo nelogično.

Hvala vam.

NIKOLA ŠPIRIĆ

Zahvaljujem.

I sada vas molim da pokušamo se vratiti na dnevni red, barem završiti danas ono što...

Kolega Želimir Nešković, izvolite.

ŽELIMIR NEŠKOVIĆ

Hvala.

NIKOLA ŠPIRIĆ

Ne vrijedi apel.

ŽELIMIR NEŠKOVIĆ

Šta kažete?

NIKOLA ŠPIRIĆ

Kažem, ne vrijedi izgleda apel da se vratimo dnevnom redu, ali ajde.

ŽELIMIR NEŠKOVIĆ

Pa evo ja se nadam da ćemo završiti, a i Vi nam možete tu olakšati mnogo.

Ovaj, ne znam u kom kontekstu spominjete SDS. Hoćete da poredimo žrtvu SDS-a i SNSD-a, je li? Ovaj, pa SDS je podnio ogromnu žrtvu i hvala Vam što ste to spomenuli, evo da to čuju i naši građani. Ali rano pričamo o tome, godinu i po dana je do izbora, osim ako se nešto ne desi prije. Ovaj, nema potrebe da na tome sad pokušavamo skupljati političke poene. Stranka kojoj ja pripadam je podnijela ogromnu žrtvu za Republiku Srpsku i zbog toga je sankcionisana nebrojeno puta. Znači, ljudi su iz SDS-a ležali u zatvoru jer su štitili Republiku Srpsku, politički su sankcionisani, oduzamani su im pasoši, nisu mogli da rade, njihovi članovi porodica nisu mogli nigdje da se zaposle, nisu mogli da putuju, da pređu granicu, da izađu bilo gdje. Ukinuli nam račun, pa zar to nije dovoljan pokazatelj da mi nemamo nikakvu, nikakav protektorat nad sobom. Upravo to što Vi sad govorite da je činjenica jeste da je SDS ustvari najmanje u cijeloj BiH od svih političkih organizacija bio zagrljen od strane nekog stranog faktora. Znači, bio je maltene zadavljen. Tako da to, a vi ste imali privilegiju itekako da budete stimulisani duži niz godina i sada kada imate problem u saradnji sa međunarodnom zajednicom sada pozivate na neka pitanja evo koja nisu uopšte vezana za SDS. Ne znam u kom kontekstu to spominjete kad dobro, dobro znate koliku žrtvu smo podnijeli za razliku od vas.

Hvala.

NIKOLA ŠPIRIĆ

Zahvaljujem.

Javlja se Nenad Vuković. Ja Vas molim da se vratimo dnevnom redu.

NENAD VUKOVIĆ

Pa evo u skladu sa razumijevanjem da postoji sve više onih koji smatraju da pretjerujemo u ovom dijelu insistiranja kad su u pitanju tačke dnevnog reda koje Vi ne želite da stavite na dnevni red, ja moram evo se izvinuti svima koji smatraju da je viška ovoliki broj javljanja na jednu istu temu. Ali isto tako postavljam pitanje i sebi i Vama, da li pod navodnicima „naše popuštanje“ u ovom pogledu će dati rukovodstvu za pravo da kaže preživjeli smo danas, idemo dalje. Ja nažalost, da kažem, svjedočim mnogim stvarima u prethodnim godinama i decenijama i znam otprilike mentalitet razmišljanja političara koji su dugo u sistemu i koji evo na ovaj način rade kako mi to

vidimo da radi Kolegij. Hoću da se opravdam i ja i kolegu Želimira koji najviše insistiramo na ovim stvarima da shvatite da ovo zaista nije za nas pozornica nego da je ovo insistiranje da ove stvari moramo istjerati do kraja. I znate zbog čega ja sad gledam, mene je sramota, četvrti put se javljam po ovom pitanju, pa zato što ljudi ne žele da kažu ni jednu riječ. Pa pazite, ni jednom mi nismo čuli od predsjedavajućeg ili člana Kolegija da nam objasne član 76. koji sam ja dva puta čitao od prvog, odnosno 4. stav. Pa kako možete da ignorišete to, je li sad rješenje Vi se naslonite, namjestite mozak kako se to žargonski kaže u stilu – pričajte vi, ja ću ovo obaviti kako sam ja zamislio. Pa zaustavite se više u tome, prekinite to raditi. Ovo je jedna nemoguća situacija. Nemoguće je ovo završiti na način da se Vi naslonite i kažete evo ispričajte se vi, ja sam na svojoj tački dnevnog reda koju sam ja zamislio, a to što se Vi pozivate da ne zaslužuje ni komentar Vaš, pa ljudi, znate li vi gdje vi sjedite? Sjedite na mjestu gdje ste dužni da objasnite ovo na šta mi ukazujemo kroz povrede Poslovnika. Vi samo govorite - nastavite dalje. Prozivate ljude ovdje kao, o čemu se radi ovdje? Hajte molim Vas probudite se. Probudite se na tom mjestu, dajte obrazloženja, dajte komentar na dopunu dnevnog reda, na zahtjev za novu sjednicu, na član 76., na ignorisanje svega ovoga. Ma ne možete izaći iz ovoga na način da brutalno sve ovo ignorišete sa stalnim ponavljanjem rečenice – nismo na dnevnom redu. Nego na čemu smo? Izađite za govornicu i recite šta imate po ovim pitanjima da bi mogli dalje da nastavimo da radimo. Pa nije ni nama ljudi interes ovdje da se držimo na ovome sad beskrajno. Želimo da prevaziđemo ovo, želimo i mi da dođemo do Zakona o platama. Želimo i mi da pričamo o PDV-u, želimo da dođe budžet na dnevni red. Mi zaista želimo da pričamo oko pravih stvari koje trebaju da budu na sjednici Doma naroda, ali nemojte od nas tražiti da mi pokleknemo u svojim zahtjevima i da pristanemo na ovo što nam se servira već nekoliko sjednica i da na taj način na neki način damo signal aktuelnom predsjedavajućem da kaže – pa mogu ja ovako do kraja mandata. Kako? Pa zakazivaću ja hitne sjednice za ono što mi odgovara, a ono što mi ne odgovara to ćemo rušiti kvorum i mi ćemo tako, je li, sad da odugovlačimo da se uvlačimo u predizbornu godinu. Nećete to uraditi. Nećete to uraditi. Molim dajte odgovor na sve ovo što smo do sad radili. Niste samo,

NIKOLA ŠPIRIĆ

Vrijeme, kolega Vukoviću.

NENAD VUKOVIĆ

pa čekajte, niste samo u ulozi spikera, Vi ste u ulozi predsjedavajućeg koji treba da se uključi u raspravu na temu kršenja Poslovnika koja se odnosi direktno na Vaš rad.

NIKOLA ŠPIRIĆ

Vrijeme.

NENAD VUKOVIĆ

Ništa niste rekli o tome cijeli dan, a onda mi dobivamo ovdje na neki način packe kao da trebamo mi da smanjimo priču. Pa smanjit ćemo je kad dobijemo obrazloženja. Ne možemo da je smanjimo.

Hvala.

NIKOLA ŠPIRIĆ

Posebna sjednica nije zakazana na moj zahtjev nego na zahtjev pet delegata i delegata gospodina Smajića u skladu sa Poslovníkom. Tako da je ispoštovana inicijativa i zakazana sjednica poslovnički.

Javio se za riječ Zlatko Miletić. Izvolite.

ZLATKO MILETIĆ

Predsjedavajući, još nas niste obavijestili Vi ili Vaš kolega zašto nema Zapisnika s prošle sjednice, to je prva stvar.

Druga stvar, znači, ne možete nam osporiti pravo da imamo predlagat dopunu dnevnog reda. Pa to, ljudi moji, ne može. Ja sam taj stav branio kad je gospodin Nešković prošli put ili kad smo imali problem oko onog, oko zakona kad je u pitanju ovaj Sud i ja sam tad štitio njegov integritet i gledao sam kako ste se ponašali prošli put kad su kolege ustvari predlagale prvi put, kad su iznosili zahtjev za ovu Vašu smjenu koliko ste ustvari ugrožavali njihov integritet. To je suprotno etničkom kodeksu, ljudi moji. To je suprotno Poslovníku ima najmanje pet članova.

Znači, ja Vas molim lijepo, nemojte to da radite, jer to što radite Vi nama ovdje demonstrirate silu. Možda će to danas proći na ovaj način, pa to neće vječno Vam prolaziti. Znači, ja Vas molim da toga budete svjesni i odgovor gdje vam je Zapisnik?

NIKOLA ŠPIRIĆ

Ja još jednom molim ako možemo da se vratimo u dnevni red, da riješimo ono što možemo. Ja vidim da danas izgleda postoji rješenja za sve izazove pred zemljom i volio bih da je to tako, ali evo moja molba da se vratimo (?) dnevnog reda koji je predložio Kolegij na zahtjev pet delegata i drugi Zakon na zahtjev jednog delegata. Da se posvetim tom, bit će vremena još za ove rasprave, ko će ostati, ko će doći, ko će otići, nemojte se sekirati. Otkud, nema potrebe za tom vrstom nerveze.

Povreda Poslovníka, Nenad Vuković. Izvolite.

NENAD VUKOVIĆ

Ma mislim da je bila ispravka krivog navoda, ali ne mijenja stvar.

Pazite, ja Vas pažljivo slušam, ja se neću dekoncentrisati nakon pet sati. Ništa mi niste odgovorili. Pitaó sam Vas lijepo da mi odgovorite na pitanje vezano za član 76., Vi ste odgovorili na način da ste rekli sjednica je zakazana na zahtjev delegata iz SDA i gospodina Smajića vezano za drugu tačku dnevnog reda, nebitno. Ali ne odgovarate na pitanje koje sam Vam ja postavio na osnovu čega sam tražio dopunu dnevnog reda. Vi, kako se to kaže žargonski, pričate svoju priču, ali Vi ne sjedite na mjestu gdje možete da pričate svoju priču nego gdje trebate da poštujuete Poslovník. Tačno je da došao zahtjev od njih za sjednicu ovu hitnu ovdje, ali isto tako je tačno da ste Vi trebali na Kolegiju kad ste došli reći – uvažavamo zahtjev za tačku dnevnog reda od SDA, uvažavamo zahtjev gospodina Smajića, međutim imamo nezavršenu sjednicu, 9., tačku dnevnog reda tu i tu zbog nedostatka kvoruma, pa ćemo na Kolegij da predložimo da završimo prvo tu tačku

dnevnog reda, pa da stavimo ova dva zahtjeva koja ste imali u međuvremenu. Tako bi trebalo da izgleda sjednica Kolegija. A šta Vi radite, pa Vi ignorišete to.

I opet Vas pozivam, recite svoj stav vezano za član 76. stav (4) koji je veoma jasan da se nezavršeni dnevni red ili tačka dnevnog reda sa prethodne sjednice mora staviti na narednu. Niste odgovorili na to pitanje. Ponavljate stvari neke koje nemaju veze s onim što Vas mi pitamo.

Hvala.

NIKOLA ŠPIRIĆ

Hvala.

Riječ, ispravka krivog navoda, kolega Zlatko Miletić. Izvolite.

ZLATKO MILETIĆ

Pošto se Vi, predsjedavajući, ko biva, nama žalite kako to da započnete ili da završite ovu, pod navodne znake „10. sjednicu“, evo da Vam pomognem pa da Vam sugerišem dva načina. Prvi način je da izvršite dopunu dnevnog reda. Znači, sve u skladu s Poslovníkom. Nećete to, imate drugi način da glasamo o ovom Zaključku da odmah održimo 11. sjednicu i da ta pitanja koja Vam je kolega Vuković predložio da to riješimo. Znači, ja Vas evo zaista molim izaberite koji je najpovoljniji način po Vas, ja sam za svaki od predloženih.

Hvala lijepo.

NIKOLA ŠPIRIĆ

Ja vas molim ponovo da se vratimo dnevnom redu. Ko ima inicijativu za zakazivanje nove sjednice neka ga poslovnički oblikuje i ona će biti zakazana u skladu sa Poslovníkom.

Dakle, vraćamo se na raspravu.

**Ad. 1. Zahtjev Predstavničkog doma Parlamentarne skupštine BiH za razmatranje Prijedloga zakona o dopuni Zakona o platama i naknadama u institucijama Bosne i Hercegovine po hitnom postupku, u skladu s članom 124. Poslovníka Doma naroda, broj: 01-02-1-2385/24 od 19. 12. 2024.**

NIKOLA ŠPIRIĆ

Zahtjev je prosljeđen da se raspravlja o njemu u hitnoj proceduri.

Otvaram raspravu o proceduri.

NENAD VUKOVIĆ

Vi sad kao prevazišli smo to, gotova je priča i Vi ste došli kao do onoga do čeg Vi želite, je li, to je sad tema.

Ja sad pozivam generalnog sekretara Doma naroda BiH i Sekretarijat da da svoj stav vezano za naše pitanje o članu 76. i ja koliko znam, nama sekretar Doma i Sekretarijat kao stručna tijela služe da ne bi, da kažemo, zadnja bila ili da ne bi tumačili političari određene stvari u koje se možda razumiju ili ne razumiju, ili ako ne možemo da dođemo do toga šta je ispravno.

NIKOLA ŠPIRIĆ

Molim Vas, ponovo, dnevnom redu da se vratimo, kolega Vukoviću.

NENAD VUKOVIĆ

Ja Vas molim, pozvao sam i...

NIKOLA ŠPIRIĆ

Niste pozvali.

NENAD VUKOVIĆ

ta praksa, ta praksa je bila i u ranijim vremenima da Sekretarijat i generalni sekretar da odgovore iz oblasti naročito pravnih pitanja, tumačenja Poslovnika i ja Vas pozivam da se izjasnite. Inače, moramo postaviti pitanje što će nama Sekretarijat i generalni sekretar nego upravo za ta pitanja. Za šta nam služi Sekretarijat Doma naroda nego da nam kaže šta u ovakvim situacijama. Je li to struka? Je li piše u konkursu generalnog sekretara on mora imati pravni fakultet, da to, to, to treba da ima da bi bio generalni sekretar Doma naroda i da je najpozvaniji da da odgovore na određena pitanja. Ja pozivam Sekretarijat da se izjasni po ovim pitanjima. Nemamo mi šta ovdje sad da tumačimo je li upravo gospodin Špirić ili smo mi. Recite svoj stav o članu 76. koji kaže – ako se ne završi sjednica, mora na narednoj da bude to pitanje. Dajte svoj stav o tom pitanju, član 76.

NIKOLA ŠPIRIĆ

Zahvaljujem.

Kolega Kovačević, je li tražena pauza ili?

Nema potrebe.

\_\_\_\_\_ (?)

/nije uključen mikrofoni/

Mogu ja samo sekund...

NIKOLA ŠPIRIĆ

Evo...

GORDANA ŽIVKOVIĆ

Dozvolite mi da vas pozdravim po prvi put u drugom mandatu. Nisam imala do sad prilike da se javim na ovakav način.

Hvala gospodinu Vukoviću na pitanju i prilici da Vam kažem da su prava i dužnosti sekretara Doma regulisani članom 189. Poslovnika, vrlo taksativno, vrlo precizno. Znači, nema,

ove nadležnosti da ja imam, ja ne bih zaista ni na koji način ulazila u nadležnost Kolegija Doma naroda koji je opet u skladu sa relevantnim odredbama Poslovnika nadležan za tumačenje Poslovnika. Tako da član 189. vrlo taksativno navedeno zašto imamo sekretara i koji su bili uslovi tačno i koji su razlozi zašto sam ja ovdje.

Hvala.

NIKOLA ŠPIRIĆ

Zahvaljujem sekretaru kolegici Živković.  
Zlatko Miletić, ispravka krivog navoda.

ZLATKO MILETIĆ

Prvo da se sekretarki zahvalim na ovom profesionalnom tumačenju.

A vas dvojicu da upitam da onda vi protumačite jer je to vaša nadležnost. Usput, da mi protumačite član ili članak 61. Poslovnika koji se odnosi na dopune i izmjene dnevnog reda, šta može izaslanik a šta ne može i član ili članak 62. kad se dnevni red smatra usvojenim. Eto, znači imate tri člana pa mi vas dvojica protumačite.

Hvala lijepo.

NIKOLA ŠPIRIĆ

Hvala Vam lijepo.  
Riječ je tražio...

\_\_\_\_\_ (?)  
/nije uključen mikrofon/

NIKOLA ŠPIRIĆ

Molim?  
Kolega Đonlagić, izvolite.

DŽENAN ĐONLAGIĆ

Zahvaljujem, predsjedavajući.

Kad budete pripremali to tumačenje i kad nam budete dostavljali, ja Vas molim samo, gospodine Špiriću, da iznesete tad i svoj stav da li je slučajno devet veći od šest, da i to uključite u to tumačenje pa samo da nam razjasnite da li je devet veći od šest.

Eto, hvala.

NIKOLA ŠPIRIĆ

U svakom slučaju je devet veći od šest, ali u Predstavničkom domu.

\_\_\_\_\_ (?)  
/nije uključen mikrofon/

NIKOLA ŠPIRIĆ

Zato što se radi o dva različita doma. Ovo je Dom naroda, a ne naroda.

\_\_\_\_\_ (?)  
/nije uključen mikrofon/

NIKOLA ŠPIRIĆ

Dakle, Vi to znate kao i ja. Samo slušam i okej, možete dobiti riječ kad god hoćete, ali morate da znamo da sjedimo u Domu naroda, a ne u Predstavničkom domu. Tamo postoji isto Pravilnik, većina, Poslovnik, kvorum, sve izdefinisano i Vi to sve dobro znate. Ja vas ponovo molim da se vratimo u okvire dnevnog reda da uradimo ono što možemo danas. Ako nećete, možemo ostati koliko god hoćete, ali ja mislim da to ne treba činiti. Kako će se završiti ovi procesi, na koji način, kako će se prestrojavati i hoće li, dajte pustimo da to teče normalno bez zasjeda, diverzija, galame, ružnih riječi. Nema potrebe za tim, sve je definisano Ustavom i Poslovnikom i ništa izvan toga neće niti može...

\_\_\_\_\_ (?)  
/nije uključen mikrofon/

ZLATKO MILETIĆ

Predsjedavajući.

Član ili članak 81. Rezultati glasovanja, kad već o njemu pričate u Domu naroda piše sljedeće:

– Na kraju postupka glasovanja predsjedatelj Doma naroda konstatira koliko je glasova za, koliko protiv i koliko suzdržanih, te rezultate glasovanja sa teritorije svakog entiteta kako je predviđeno člankom IV 3. d) Ustava BiH i proglašava konačnu odluku nakon glasovanja.

Znači, ovo što Vi govorite samo da Vas upozorim da nije tačno. Znači, član ili članak 81., sve piše, sve jasno k'o dan.

NIKOLA ŠPIRIĆ

Molba, ponovo ako je moguće da se vratimo dnevnom redu, ali evo ne mogu da zaustavim ovu raspravu.

Kolega Sredoje Nović, nepridržavanje utvrđenog dnevnog reda. Izvolite.

SREDOJE NOVIĆ

Uvaženi predsjedavajući, dame i gospodo.

Evo gotovo sat i po potpuno, rekao bih, jalove, je li politička ili nije, rasprava, više ne znam šta je, ali vidim da ovo stvarno ne vodi nigdje. Ako ćemo nastaviti ovdje koliko sam shvatio, predsjedavajući je prešao na prvu tačku dnevnog reda i umjesto da raspravljamo o toj tački mi se sad vraćamo ponovo na to. Ako ćemo ovako, onda predlažem da mi ili napustimo sjednicu, da

kažemo da nemamo uslova, da ne želimo dalje da raspravljamo o bilo čemu ili da mijenjamo nešto. Zaista se ne pridržavamo dnevnog reda. Naravno, govorili smo evo sat i po o argumentima, kolege su iznosile za predlog da se uvrsti, ne uvrsti i tako dalje i tako dalje. Ja zaista mislim da dalja rasprava o onom što smo raspravljali ne vodi ničemu i predlažem da se pređe na, da razgovaramo o prvoj tački dnevnog reda na koju smo već bar koliko sam ja shvatio prešli.

NIKOLA ŠPIRIĆ

Zahvaljujem gospodinu Noviću.  
Džemal Smajić, ispravka krivog navoda.

DŽEMAL SMAJIC

Zahvaljujem, predsjedavajući. Pozdravljam sve prisutne obzirom da se prvi put javljam danas.

Samo sam htio da mi pojasnite, predsjedavajući. Ja sam stekao utisak u jednom momentu isto kao i kolega Sredoje Nović da smo mi već otvorili raspravu i diskusiju o prvoj tački dnevnog reda. Pa ja bih volio da nam to pojasnite jesmo li i molim Vas ako jesmo da se držimo tačke dnevnog reda i da počnemo diskutovati o prvoj tački dnevnog reda.

Hvala.

NIKOLA ŠPIRIĆ

Zahvaljujem kolegi Smajiću.

Ja činim sve što mogu, nije do mene. Poslovnički ne mogu nikom oduzeti riječ i moja je molba stalno da se vratimo na dnevni red i otvorena rasprava o prvoj tački dnevnog reda i moja isto molba i mislim da su kolege Smajić i Nović upravu.

Ali evo ponovo imamo kolegu Želimira Neškovića. Povreda Poslovnika.

ŽELIMIR NEŠKOVIĆ

Poštovani predsjedavajući, Vi stvarno iznova i iznova kršite Poslovnik. Ne znam je li to način da nam pokažete da zaista stvarno onda ne treba ni da radite, ovaj, na tom mjestu. Možda želite da nas ubijedite pojačano. Ja koliko sam primjetio, ovaj, u zadnjih par minuta, Vama je nekoliko delegata uputilo pitanje da im rastumačite određene nejasnoće, a Vi se ovdje ponašate, uz dužno poštovanje, ako me možete saslušati, ovaj, kao na švedskom stolu. Birate one Vaše ingerencije koje Vam pašu, da prećutate, progurate određenu tačku dnevnog reda ili je zaustavite, ne odgovorite. Pa ne možete, znači, po određenim pitanjima odgovarati, zauzimati određene stavove, a po drugima ne odgovarati. Ako Vas ljudi pitaju, oni su u Vašem rangu. To što ste Vi trenutno predsjedavajući Kolegijuma ne umanjuje značaj ovih ljudi ovdje. Bojim se da na ovaj način na koji trenutno radite da zaista dovodite do apsurdna današnju sjednicu. Znači, ako Vas pita delegat, znači visoki funkcioner u ovom najvišem Domu u BiH, pa dajte uvažavajte ljude. Pa ni osnovnu logiku ako Vas neko pita, ne znam, je li veće, Vi nećete da kažete, nećete da odgovorite ili na drugi način to činite u odnosu na ono što Poslovnik nalaže. Ako se držite Poslovnika

ispoštujte ove delegate do kraja inače obesmišljavate ne samo sebe, nas sve, ovaj visoki Dom. Znači, na ovaj način ovako raditi ja ne znam da li je ovo karakteristično ni za mjesne zajednice u lokalnim zajednicama koje imaju po 150 stanovnika. Dajte, molim Vas. Znači, dovodimo do apsurdna naš rad. Ja to neću sebi da dozvolim. Vi ako hoćete da dozvolite takav način rada, znači računajte da tu imaju drugi ljudi koji treba nešto da kažu po tom pitanju. Znači, ovakav način zaista nije primjeren.

Hvala.

NIKOLA ŠPIRIĆ

Samo kratko. Riječ je tražio kolega Zlatko Miletić, ali samo da kažem. Poslovnik tumači Kolegij. Danas iz opravdanih razloga nema trećeg člana Kolegija i ponovo vam kažem da je ovaj dnevni red Kolegij istumačio na zadnjoj sjednici, zauzeo stav da su ovo jedine dve tačke dnevnog reda i da, ako je moguće, da se vratimo da raspravimo o njima. Ako nije, a tražite tumačenje Kolegija, tražite da prekinemo sjednicu pa ćemo je zakazati ponovo. Iz svega ima izlaz. Nije vlast blitzkrieg. To nema nigdje. Ja bar ne znam da to u Poslovniku piše. Ako neko misli da će danas uskočiti, malo strpljenja, bit će sve uredu, što ste nervozni.

Kolega Zlatko Miletić.

ZLATKO MILETIĆ

Pa prvo evo predsjedavajući, ja nemam ništa protiv nit je moj neki lični ili osobni interes da Vi odete ili ne odete, to je interes institucija.

Šta hoću da kažem i zašto sam se javio. Znači, ovo nije prvi, možda je četvrti ili peti put i zaista jedan od ljudi koje ja najviše uvažavam u institucijama sistema je gospodin Nović ali moram mu reći da nije upravu. Znači, molim Vas lijepo, evo u najblažoj formi što se može desiti, opet se vraćam na član ili članak 76. (4) kaže:

– U slučaju da nema kvoruma, te ako nakon stanke predsjedatelj Doma utvrdi ili glasovanje pokaže da i dalje nema kvoruma, razmatranje pitanja odgađa se za sljedeću sjednicu.

Prošla je bila 9., ako mi znamo brojati ovo je 10., znači ovo je ta sljedeća. Pa da li možete vi kao članovi Kolegija nam odgovoriti šta je s tom 9. kad ste već sjedili na tom Kolegiju? Znači, morate nam odgovoriti na to pitanje. Ne može se desiti da sjednica bude prekinuta i da vi privatno kad se dogovorite, ko biva, to ćemo nastaviti. Kad? Za godinu? Kad protekne vam mandat? Znači nema stvarno to smisla. Znači, eklatantno kršenje Poslovnika. I evo dajemo vam na gospodski, fin način da izađemo iz ove situacije. Čovjek vam je dao dva prijedloga, jedan je da dopunite ako se već radi o sljedećoj sjednici da dopunite dnevni red. Nećete to, imate Zaključak da odmah održimo 11. sjednicu i da to pitanje riješimo. Ne znam šta je problem.

NIKOLA ŠPIRIĆ

Riječ je tražio kolega Sredoje Nović, izvolite. Nepridržavanje utvrđenog dnevnog reda.

SREDOJE NOVIĆ

Mimo sve prakse koju ovdje upražnjavam, moram da Vam kažem, gospodine Miletiću, da to nema nikakve veze sa onim što sam ja govorio. Nađite stenogram i videćete da je predsjedavajući otvorio prvu tačku dnevnog reda i rekao da se izvolimo prijaviti za diskusije ili ja možda nisam dobro čuo, moguće da moje, ovaj, slušni organi više nisu baš tako fino podešeni kao kod Vas. Ali ako smo to prešli, pa dajte da razgovaramo onda o prvoj tački dnevnog reda. Ovo o čemu Vi govorite ništa ja ne osporavam. Upozoravate, govore jedni, drugi, peti, sve sam to naslušao se. Imate li izlaz? Ali ako ćemo ovako nastaviti, nisam spreman, moram Vam reći, lično, nisam spreman da sjedim u nedogled i 52 puta slušam sve isto. Dajte da završimo ovo što smo počeli, što smo prešli na prvu tačku dnevnog reda. Opet kažem, ako nismo prešli na prvu tačku dnevnog reda, ja se onda svima izvinjavam što se toga tiče. Ali čini mi se da jesmo i spreman sam da diskutujemo o zakonima, odnosno prvo o Zakonu koji je na dnevnom redu. Ako ne, dajte da idemo ili da pravimo pauze u nedogled, ako će one nešto pomoći, ja sam spreman i to ali ja ne vidim, čini mi se ako ćemo nastaviti ovako i dalje, ne vidim zaista svrhe da sat i po jedni drugima govorimo ono što mi, svaki od nas ponaosob, misli.

NIKOLA ŠPIRIĆ

Zahvaljujem.

Riječ je tražio kolega Nenad Vuković, ispravka krivog navoda.

NENAD VUKOVIĆ

Kolega Noviću, u svom prethodnom obraćanju, ne ovom posljednjem, ste rekli da je diskusija jalova i politička.

SREDOJE NOVIĆ

/nije uključen mikrofoni/

Ne, niste me dobro ...slušali očigledno, ali sam rekao – ne znam da li je i politička...

NENAD VUKOVIĆ

Kakva, mogu li, je li mogu nastaviti?

SREDOJE NOVIĆ

/nije uključen mikrofoni/

NENAD VUKOVIĆ

Je li mogu nastaviti?

NIKOLA ŠPIRIĆ

Bez ometanja.

NENAD VUKOVIĆ

Kako ste Vi rekli, preslušajte stenogram, tako ja Vama sad kažem preslušajte stenogram, rekli ste da je diskusija bila kompletna u prethodnom periodu jalova i politička, ja ostajem pri tome, a slušaćemo stenogram i ja bih se referisao na to da nije ni jalova, a rekao bih isto tako da nije ni politička nego je poslovnička i pravna. Možda ona ima primjese političke, ali smo mi ipak na terenu Poslovnika, na terenu smo rasprava šta je u skladu s Poslovníkom, šta nije, više bih rekao da smo na terenu pravnom manje na političkom, uz nekih par diskusija koje su bile. Ne znam ni termin „jalova“ šta to znači, jel kao da nećemo, je li, imati neki rezultat od svega ovoga, pa nisam siguran hoćemo li ili nećemo na kratak rok danas, u budućnosti, ali mislim da je ispravno ovo što mi radimo, bar kolega Želimir i ja, što želimo da istjeramo ove stvari do kraja, jer mislim da je interes i ovog visokog doma da razjasnimo ova pitanja koja nas opterećuju iz sjednice u sjednicu.

Što se tiče poziva da se zaustavimo u svemu ovome, ja mislim da ste poziv trebali okrenuti se samo na drugu stranu i uputiti gospodinu predsjedavajućem koji je proizveo problem zbog koga se mi ovdje nalazimo, ne trebate nas pozivati, mi ćemo se zaustaviti onog momenta kad nam se odobre prava iz ovog Poslovnika. Mi smo ponavljali, kao što su mnogi rekli, ne znam koliko puta, da sad ne licitiram brojevima, zato što ne možemo da dobijemo odgovor na član 76. koji je decidan i jasan i na bazi kršenja tog člana ne pridržavajući se njegovog jasnog četvrtog stava koji kaže da se mora tačka sa prethodne sjednice naći na ovoj, na bazi toga je nas predsjedavajući doveo da mi danas moramo da radimo ovo što radimo i da pričamo ovoliko puta koliko pričamo. Prema tome, nije fer, nije fer okrenuti se prema nama i reći nama da smo mi naporni, da mi ne razumijemo dnevni red, da uradimo što možemo i sve ono što smo čuli, nije fer.

SREDOJE NOVIĆ

/nije uključen mikrofon/

NENAD VUKOVIĆ

Pa u redu onda,

SREDOJE NOVIĆ

/nije uključen mikrofon/

NENAD VUKOVIĆ

Pa ja sam osjetio da je

SREDOJE NOVIĆ

/nije uključen mikrofon/

Jeste li prozvani?

NENAD VUKOVIĆ

Nisam.

SREDOJE NOVIĆ

/nije uključen mikrofon/

NENAD VUKOVIĆ

Evo, ja povlačim, ako nije prema nama, ali rekao bih neka

SREDOJE NOVIĆ

/nije uključen mikrofon/

NENAD VUKOVIĆ

Dobro, neka sudi, neka sudi javnost i mi koji smo ovdje prisutni o svemu tome, slažem se da sigurno niste rekli ime, Vi ste tu veoma, da kažem, oprezni i ne bih mogao reći da je bilo ko lično prozvan, ali sam se osjetio da smo mi dio te priče neke za koju ste Vi dali takve kvalifikacije. Ja samo upućujem i kažem ovo je reakcija na akciju koju je sprovelo rukovodstvo Doma, naročito predsjedavajući i da budemo tu jasni.

Što se tiče gospođe sekretara i njenog obraćanja, zahvaljujem Vam što ste se obratili, mislim da to nije ništa neuobičajeno i poželjno je da se po određenim pitanjima javite i ne bih rekao da to treba shvatati kao neki problem što sam tražio da se oglasite. Pozvali ste se na član 189. da tu piše šta su dužnosti sekretara, pa ne znam kako se niste našli odma u stavu a) – Pomaže Kolegijumu Doma i predsjedavajućem u obavljanju dužnosti. Pa što ne pomognete? Pa pomozite, piše da pomažete, pomaže Kolegijumu Doma i predsjedavajućem Doma u obavljanju njegove dužnosti. Pomozite mu tako što ćete reći šta je ispravno, to je Vaša pomoć i da kažete na sjednici Kolegijuma – predsjedavajući moram Vam reći kao sekretar Doma imate član 76. možda ste zaboravili, a ja Vam pomažem u skladu s ovim članom 189. po a) dužna sam da Vam pomognem, pa želim da Vam kažem da morate staviti tačku dnevnog reda s prethodne sjednice na ovu, jer je to moja dužnost, Vi možete da je ne stavite, ali ja kao sekretar Doma Vam sam dužan da pomažem i pomažem Vam tako što Vam kažem šta ste dužni da uradite. A ne Vi ste mene, da kažem žargonski, skinuli s dnevnog reda nemate Vi nadležnost, je li. Imate nadležnost i treba da pomažete i to je Vaša pomoć.

Hvala lijepa.

Opet tražim posljednji put, odnosno ne posljednji recite više šta mislite o članu 76. izjasnite se.

NIKOLA ŠPIRIĆ

Ispravka krivog navoda, kolega Želimir Vučković(?) po ko zna koji put. Izvoli.

ŽELIMIR NEŠKOVIĆ

Nije baš ko zna, prebrojaću, ja mislim peti. Ovaj, zahvaljujem predsjedavajući, poštovani predsjedavajući, pa meni se čini da Vi zaista želite da blokirate, da nastavite da blokirate rad ovog visokog doma ponovo. Ovaj i kako idemo iz minuta u minut jednostavno ne mogu da se oduzmem drugačijem utisku u odnosu na ovaj koji sam sad rekao. Da ste imali ozbiljnu namjeru da radimo aktivno, da rješavamo, ama Vi biste to, ja znam pratio sam Vaš sjednice i ranije i čak kad čitate tačke dnevnog reda to ide brzo, po pedeset ih pročitate za dva minuta, doduše sad koliko ih razumijemo to je nešto drugo, ali ovaj zaista mi se čini da pokušavate da blokirate rad ovo visokog doma i praktično da nastavite to da radite. Ako ste to učinili na prošloj sjednici i evo nismo je još završili i meni zaista ovo ovako postaje apsurdno, mislim način na koji nam dajete odgovore, to sam rekao prošli put, a evo i sada, pa vrijeđa inteligenciju vjerujte, vrijeđa inteligenciju i nema smisla, znači, to na koji način Vi nama šaljete poruke,

dajte odgovore, kao nešto nas savjetujete, pa mi treba da klimnemo glavom da Vam se zahvalimo zbog toga. Znači, smiješno, stvarno smiješno, ja ne znam ovi ljudi koji gledaju, ovaj, ako sad neko gleda, a gleda sigurno preko Jutjuba ili negdje, ovaj, možda je bolje da pogase ove kanale, jer nema smisla na ovaj način uopšte raditi u ovom visokom domu. A ako mislite da ja žurim za nekom vlašću, ja uopšte ne žurim

NIKOLA ŠPIRIĆ

Vrijeme, kolega Nešković.

ŽELIMIR NEŠKOVIĆ

ako ste to doživili lično, ja ne pretendujem na Vaše mjesto, nemam zaista tu ambiciju tog tipa.

Hvala.

NIKOLA ŠPIRIĆ

Zahvaljujem.

Ispravka krivog navoda, kolega Miletić. Izvoli.

ZLATKO MILETIĆ

Moram se javiti po dva osnova, evo da se izvinem gospodinu Noviću možda me je pogrešno shvatio. Znači, sve što ste Vi rekli u ovoj svojoj zadnjoj diskusiji, ja to podržavam bez daljnjeg, Vi ste u potpunosti u pravu kad ste rekli da je predsjedavajući otvorio tačku dnevnog reda, da o tom treba raspravljati i ok, je ne sporim to. Međutim i Vi ste svjesni situacije da nam predsjedavajući ovdje pokazuje samovolju, ako njegov zamjenik kaže da on nije za i nas većina ovdje da nije za, pa ne može čovjek ignorisat naše zahtjeve koji su u skladu s Poslovníkom, ja o tom govorim. A što se tiče tačaka dnevnog reda, ja jesam i za jednu i za drugu.

I gospodine Vukoviću, da Vas zamolim, znači ne slažem se s Vama, ako piše u Poslovníku u tom članu koji ste citirali da sekretarka pomaže, to ne znači da ona je ona izvršni organ i otkud, znači ne možemo prejudicirati je li ona htjela pomoći ili nije htjela pomoći, prevashodno su za ovu situaciju odgovorni članovi Kolegija, za ovo danas i ovo sve unazad što se dešavalo dva, tri mjeseca. Sad možda oni, možda je žena savjetovala i da im pomogne, možda oni ne prihvaćaju takvu vrstu pomoći.

Šta želim da kažem? Dajte da vas zamolim, zaista, da gospodski, pa evo ovo što ste Vi predsjedavajući predložili, ako Vam treba vremena, pa eventualno da ovo odgodimo, pa da se sastanemo neki drugi, ja nemam ništa protiv, ali ovo pitanje moramo riješiti na sistemski način. Ovdje je u pitanju sistem, ovdje nije pitanje koji će pojedinac gdje sjesti, ali ovo ovako zaista, znači morate biti svjesni da ovo ovako ne može funkcionirati.

NIKOLA ŠPIRIĆ

Zahvaljujem.

Kolega Nenad Vuković, ispravka krivog navoda.

NENAD VUKOVIĆ

Pa evo ja ću se zahvaliti kolegi Miletiću, možda i nisam sa adekvatnim tonom završio svoj komentar vezano za sekretara Doma i u tom dijelu je moja zahvalnost što ću evo da kažem možda biti malo jasniji. Naravno da ja ne vidim odgovornost kod sekretara Doma i moja diskusija uopšte nije usmjerena bila na to da kažem da je sekretar Doma odgovoran za ono što radi Kolegij i naročito ne predsjedavajući, ali sam bio veoma precizan i ne znam, da kažem, šta je problem ako tumačimo riječ „pomaže“ da pomaže, pa nego kako da pomogne drugačije nego da istumači nešto sa aspekta svoje struke koja je direktno vezana za Poslovnik i to nije prozivanje na bazi odgovornosti da mi sad danas imamo problem zbog sekretara Doma. Nemamo, ali isto tako je, po meni, logično zahtijevati da se sekretar Doma na ovim temama uključuje i tako pomogne dajući svoj stav o nekim stvarima. Ako je to previše što ja tražim recite mi – previše je, ne treba, sekretar Doma samo treba fascikle nositi. Pa ne treba nego upravo treba ovo da radi. Ljudi sekretar Doma, znate li vi šta je to? Jako visoka pozicija u ovom visokom domu, nije to sekretarica nego, uz svoj uvažavanje i poslova i sekretarice, to je sekretar Doma. Prema tome u tom kontekstu sam tražio da se uključi i da u skladu s ovim članom pomogne u svemu ovome da s aspekta svog znanja kaže svoj komentar na bazi ovoga ne želeći da kažem da je odgovornost na sekretaru Doma. Nije odgovornost na sekretaru Doma, odgovornost je na predsjedavajućem i na Kolegijumu.

Što se tiče, molim vas, ovog ..., još jednom ponavljam predsjedavajući Doma i sekretar Doma nisu rekli svoje mišljenje o članu 76 i ponavljam na kraju ne može proći sistem zakazivanja hitnih sjednica, koji je očigledno zamišljen, na način da se spriječi raspravljanje o tačkama dnevnog reda koje se zovu razrješenja i smjene, a da se zakazuju sjednice na kojima će biti budžeti, zakoni itd. Ako je to osmišljeno kao projekat koji će zadržati manjinu da sjedi u ovome Kolegiju to neće proći, ali tu ne snosimo mi odgovornost za naše diskusije nego vi koji ste osmislili takav način funkcionisanja Doma naroda da na bazi hitnih sjednica, ova nam ne odgovara rušimo kvorum, ova nam ne odgovara raspravljamo o ovome, a zaboravićemo šta je bilo na prethodnoj. Neće to moći, a shvatite jednostavno da to neće moći, ali ne možete uprijeti prstom u nas da mi nešto ne razumijemo, da mi nešto ne znamo ili da ćemo se mi eventualno umoriti i da ćemo mi pod pritiskom dugih rasprava reći – ma ne, ne, pa dobro ispričali smo se, ali mi nastavljamo onako kako ste vi zamislili. Neće biti tako.

Hvala.

NIKOLA ŠPIRIĆ

Zahvaljujem.

Pre nego dam riječ, naravno svak ima pravo da kaže i ono što govori govori o sebi, ali dužan sam kao predsjedavajući da stanem u zaštitu sekretara Doma. Porediti sekretara Doma sa sekretaricom, koja ovo mnogo bolje zna, ja mogu reći, i od mene.

\_\_\_\_\_ (?)  
/nije uključen mikrofon/

NIKOLA ŠPIRIĆ

Vratite, vratite stenogram. Ja znam da vi u rezervi imate i kandidata za sekretara Doma, ali polako, polako i to ste pripremili, ali sve treba da se vidi da bi bilo jasno i da bi došlo do rješenja. Ja samo govorim

nemojte nagla rješenja hajte malo poštujmo Ustav, Poslovnik, sve što možemo da ispoštujemo, što ne možemo, ne možemo.

Kolega opet nema volje, kolegica Pendeš čeka dugo kao prvi diskutant o dnevnom redu.  
Kolega Želimir Nešković.

ŽELIMIR NEŠKOVIĆ

Pa ne mogu da ne odgovorim gospodinu Miletiću zaista, gospodine Miletiću, molim Vas, znači upućujem Vam ispravku krivog navoda. Ja se ne slažem s Vama da sjedamo neki drugi dan, mislim da niste u pravu. Nema razloga da sjedamo neki drugi dana evo znači nismo nastavili 9. hitnu sjednicu, znači nije nam to dozvolio predsjedavajući Kolegijuma, iako mu njegov, znači, prvi zamjenik sugerise da treba to da uradi. Znači, imamo masu nejasnoća ovdje. S druge strane ne dozvoljava nam dopunu dnevnog reda i na to mu sugerise veći broj delegata ovdje, znači plus prvi zamjenik predsjedavajućeg. Znači, ne vidim zašto bismo odlagali, dajte danas da završimo ovaj, hajte da danas imamo tu hitnu sjednicu. Ako je gospodin Špirić predsjedavajući, dajte molim Vas, gospodine Džaferoviću evo kratko ću ja, molim Vas, znači hvala, ovaj, ako ima dobre namjere, a ja vjerujem da ima i ako se možda zbunio u ova prva dva navrata i nije sporno, nije sporno, šta desi se i meni se dešavalo, nije, nije. Znači, evo dobre prilike, znači ako je dopuna nije adekvatna za njega evo nije sporno, dajte danas da dogovorimo, pustite ljude da odglasaju, da imamo danas ovaj na dnevnom redu novu hitnu sjednicu i da ne gubimo vrijeme. Znam da se slažete sa mnom, ali evo ako su ove prve, prva dva razmišljanja bila u tom pravcu dajte da razmišljamo sad konstruktivno. Ja vjerujem da gospodin Kovačević, on je, on je čovjek, generacijski smo blizu i ja vjerujem da će on to ovaj shvatit.

A kada govorite o sekretaru i sami kažete da sekretar ima bolje znanje kada je u pitanju Poslovnik o radu ovog visokog doma od Vas, ako sam dobro shvatio da, neću da vrijeđam to su Vaše riječi, pa dajte sekretaru da rastumači, dozvolite sekretaru da rastumači slobodno ne morate uticat da se ne odgovori. Dajte da nam neko rastumači, Vi nećete razumijem, u redu, Vi kažete da to bolje sekretar zna od Vas, pa dajte nek nam sekretar to rastumači i da više otvorimo sve dileme. Evo da više, ovako ne znamo je li idemo desno, lijevo, jesmo li nešto usvojili, jesmo na dnevnom redu, evo ja sad, ja zaista sad ne znam, evo postavljam pitanje – jel smo mi sad na dnevnom redu ili smo još ili smo prešli

NIKOLA ŠPIRIĆ

Vi niste, a Dom jeste.

ŽELIMIR NEŠKOVIĆ

ili smo prešli na, na tačku, ovaj, prvu tačku? Hvala.

NIKOLA ŠPIRIĆ

Vi niste odavno na dnevnom redu, ali Dom jeste i ja molim ako ima volje da se vratimo dnevnom redu, a ako nema volje da tražimo pauzu sat vremena da se malo ohladimo, pa možda nam krene da se vratimo na dnevni red. Vidim da vi pominjete i druge metode, ok, stvarno mislite da to može tako.

Dakle, pauza sat vremena pre Vukovića, malo ohladite glave da se vratimo na ...

/PAUZA/

NIKOLA ŠPIRIĆ

Dame i gospodo prošlo je sat vremena predviđenih za pauzu nastavljamo sa radom.  
Ja se prijavljujem samo za pošto sam tražio pauzu, Kenane najavi da izađem za govornicu.

PRVI ZAMJENIK  
PREDSJEDA VAJUĆEG  
KEMAL ADEMOVIĆ

Izvoli predsjedavajući.

NIKOLA ŠPIRIĆ

Gospodine zamjeniče predsjedavajućeg, cijenjene kolege i kolegice delegati svjedoci ste da danas duže od dva sata kroz nekoliko desetina, 37 ili 40 ispravki krivog navoda, povrede Poslovnika, nije postojala želja da se raspravlja o dve tačke dnevnog reda koje su delegati i delegat tražili po hitnoj proceduri. Ja sam zakazao sjednicu vjerujući da se radi o dva veoma važna zakona koja se tiču primanja srednje stručne spreme i poboljšanja materijalnog statusa i da to ima prednost u odnosu sve druge polemike i rasprave. Nažalost, imam osjećaj da je danas dnevni red u glavama nekih bio prvo Nenad Vuković, pa zaposleni i njihove plate. Čuli smo različitih krivih navoda, do uvreda, do toga da ne tumačimo Poslovnik, iako znate da danas Kolegij nije u punom sastavu i da i ne može da ga tumači, da je Kolegij imao jedinstven stav da ovo bude tačke dnevnog reda, to nije stav predsjedavajućeg nego Kolegija, da ga danas ne možemo promijeniti jer drugi član Kolegija opravdano je odsutan i mi iz Kluba SNSD-a ne mislimo dalje ostati na ovoj sjednici da bi se bavili trivijalnim stvarima i ako smo došli i bili spremni da razgovaramo o veoma dva bitna zakona da ih danas pokušamo usvojiti.

Hvala vam lijepo, ne želim dalje da učestvujem u uvredama, u kreiranju svog viđenja o Poslovniku i želim da dalji rad vođenja sjednice nastavi kolega Kemo Ademović po Poslovniku ovoga Doma. Dakle, Klub delegata iz Republike Srpske, tri delegata ne želi dalje da se bavi raspravama izvan dnevnog reda.

Hvala vam lijepo.

KEMAL ADEMOVIĆ

Hvala.

Obzirom da nemamo kvoruma nakon izlaska predsjedavajućeg Špirića, dakle nedostaje jedan delegat iz reda Srba u skladu s Poslovnikom dajem pauzu od jednog sata da se pokuša obezbijediti kvorum.

\_\_\_\_\_ (?)  
/nije uključen mikrofon/

KEMAL ADEMOVIĆ

Evo da vidim, evo da vidimo.

\_\_\_\_\_ (?)  
/nije uključen mikrofon/

KEMAL ADEMOVIĆ

Poslovnički je pauza jedan sat vremena da se

/zajednička diskusija/

KEMAL ADEMOVIĆ

Pa dobro, moja će obaveza biti ovdje da dođem nakon sat vremena, ko će se od vas pojaviti to nije više važno zato što

\_\_\_\_\_ (?)  
/nije uključen mikrofon/

KEMAL ADEMOVIĆ

Sat vremena pauze.

/PAUZA/

KEMAL ADEMOVIĆ

Hvala delegatima koji su nakon jednosatne pauze vratili se u salu.

Konstatujem da ne postoji kvorum, dakle kvorum su po tri delegata iz svakog naroda, ovdje vidim kompletan Klub Bošnjaka, Klub Hrvata, ali iz Kluba Srba samo je prisutna jedan, potrebna su tri.

Dakle, konstatujem da se nisu ispunili uslovi za nastavak sjednice, te ovu sjednicu proglašavam prekinutom o daljem nastavku i o sledećim sjednicama bićete blagovremeno obaviješteni.

Hvala vam još jednom.

Sjednica prekinuta u 14:55 sati.